

M512: Vorauer Novelle

0,1 ich wile ez aber wâgen .
0,2 unde wile mich selber vrâgen
0,3 ob ich iet kunne rîmen .
0,4 unde wort mit Worten lîmen
0,5 unde sinne mit sinnen kûnden .
0,6 unde wort mit worte ergrûnden .
0,7 unde kunst mit kûnste sprechen .
0,8 unde schoene latîne zerbrechen .
0,9 unde listiclich entrennen .
0,10 unde wider zesamen rennen .
0,11 in mînes herzen esse .
0,12 unde daz mîn zunge sô wesse .
0,13 würde gein herten Worten .
0,14 daz ich si ze allen orten .
0,15 schriete bûge durchstâche .
0,16 daz ich ein sûeze gesprâche .
0,17 dâ von mohte getihten .
0,18 unde meisterlich gerihten .
0,19 vile snelle ûf einen diutischen louf .
0,20 alsus daz sûezer worte trouf .
0,21 steinherte herze entslûzze .
0,22 daz ich dâr in gegûzze .
0,23 die sûezen gotes vorhte .
0,24 und swer sich hête verworhte .
0,25 daz der snelle quæme .
0,26 unde bilede unde lêre næme .
0,27 von zwein degenkinden .
0,28 als wir geschriben vinden .
0,29 diu wurden unde wâren .
0,30 in ire kintlich jâren .
0,31 ze einem klôster gegeben .
0,32 in ein geistlîchez leben .
0,33 diu kindel wâren sûnde vrî .
0,34 der heilic geist in wonete bî .
0,35 dâr zuo sô wart in ouch gegeben .
0,36 ein meister der hête reinez leben .
0,37 mit worte mit werke mit zûhten .
0,38 nâch himelschlîchen vrûhten .

0,39 wart er den degenkinden .
0,40 daz gotelich joch ûf binden .
0,41 daz truogen si vile gerne .
0,42 die edeln zwei lucerne .
0,43 wurden vile schier entzündet .
0,44 dâr nâch wart in gekündet .
0,45 zuht kunst und ère .
0,46 nâch des meisters lêre .
0,47 nû merkent alle gemeine .
0,48 die zwêne degene kleine .
0,49 wuohsen harte vaste .
0,50 mit der tugent aste .
0,51 sluoc si der meister sêre .
0,52 mit geistlicher lêre .
0,53 begunde er die degene überladen .
0,54 des nam er an der sêle schaden .
0,55 wan swer den bogen ziehen wile .
0,56 ze winde ûz der krefte zile .
0,56a der brennet einen swarzen kole
0,56b dâ von er selten geizzet wole .
0,57 der brichet in als ich wole weiz .
0,58 unde swer dem brôte tuot ze heiz .
0,59 der brennet einen swarzen kole .
0,60 dâ von er selten geizzet wole .
0,61 unde swer dem veizeten vederspîle .
0,62 mit vollem kropfe getrûwen wile .
0,63 dem mac ez wole entvliegen .
0,64 sus begunde den meister triegen .
0,65 sîn lêr unde ouch sîn meisterschaft .
0,66 die er mit überiger kraft .
0,67 sînen jungelingen bôt .
0,68 sô er mit slegen machete rôt .
0,69 ire rüggen unde ire wange .
0,70 dô gedâhten si vile ange .
0,71 wie si mohten entwîchen .
0,72 unde von den slegen slîchen .
0,73 als der edel Jonas .
0,74 der ouch von gote vlühtic was .
0,75 ze Tarsis in dem lande .
0,76 er wânte sîn unbekande .
0,77 den klâren gotes ougen .
0,78 sus vluhen âne lougen
0,79 die zwêne klôsterknappe .
0,80 von ire geistlich kappe .
0,81 in der werelte vreise .
0,82 ein klagelîche reise .
0,83 begunden si dô werben .
0,84 unde an der sêl verderben .

0,85 nâch der werelte süeze .
0,86 diu ungetriuwe grüeze
0,87 mit âküstigen blicke .
0,88 erzeiget harte dicke .
0,89 allen die ir volgent nâch .
0,90 sus was den jungelingen gâch .
0,91 nâch der werelte vröuwede .
0,92 vore gotelîcher beschöuwede .
0,93 bugen si sich vaste .
0,94 von tugentrîchem aste .
0,95 wâren si tief gefallen .
0,96 daz honic mit der gallen .
0,97 muosten si dô dôuwen .
0,98 unde üppiglich sich vröuwen .
0,99 in wereltlîcher muotküre .
0,100 von der himelschlîchen türe .
0,101 wâren si gesprungen .
0,102 unde in die strâze gedrungen .
0,103 diu dâ leitet in den tôt .
0,104 diu werelt in vramspuote bôt .
0,105 gein süntelîchen sachen .
0,106 des muoste ire herze lachen .
0,107 gelustelich gein den sünden .
0,108 dô begunde sich entzünden .
0,109 ire muot ire herze ire sinne .
0,110 in wereltlîcher minne .
0,111 von tage ze tage ie baz unde baz .
0,112 als ich ez an dem buoche lâze .
0,113 nû merkent alle gemeine
0,114 mich ein wîle kleine .
0,115 unze ich vore iuvern ougen .
0,116 diu klâr gotes tougene .
0,117 nâch sînem lobe entdecke .
0,118 dâ mit ich süntær wecken .
0,119 in tiefe riuwe der sünde .
0,120 unde klagelich gekünde .
0,121 ze iuwer anegesihte .
0,122 daz geswinde gotes gerihte .
0,123 wie sich daz habe erzeigte .
0,124 unde wunderlich geneiget .
0,125 gein disen jungelingen .
0,126 die ze süntelîchen dingen .
0,127 wâren wole bereitet .
0,128 ein stîc hête si geleitet .
0,129 ze einer stat rîchen .
0,130 dâ lâse man offenlîchen .
0,131 diu buoch nigromanzî .
0,132 daz ist von zouberî .

0,133 ein kunst diu wider – Krist .
0,134 von zouber tief getihtet ist .
0,135 nâch der sêl unheile .
0,136 sus was daz zouber veile .
0,137 als in ein pfaffe hête gesaht .
0,138 der ûz der stat in gegen reit .
0,139 dô si des rede vernâmen .
0,140 mit vröuweden balde si kumen .
0,141 in die stat gegangen .
0,142 si wurden wole entvagen .
0,143 von dem schuolhêrre .
0,144 dô er si von verren .
0,145 mit schehenten ougen sach .
0,146 lachente er in walhischen sprach .
0,147 “bescheine iu bêâer *sire
0,148 mînen kinden unde mir .”
0,149 des danketen si im schône .
0,150 mit dem gote lône .
0,151 unde mit zühticlichen sîten .
0,152 dâr nâch begunden si in biten .
0,153 durch sîne kurtoisî
0,154 daz er nigromanzî .
0,155 sie snelle hieze lêren .
0,156 si wolten gerne kêren .
0,157 muot sin unde kunst
0,158 ûf nigromanzî kust .
0,159 der meister lachen began .
0,160 er sach die zwêne gesellen an .
0,161 unde sprach nû sint ir doch gewesen .
0,162 in gotes schuole unde hânt gelesen .
0,163 swer lernen wile diu zouberbuoch .
0,164 der muoz den geswinden gotes vluoch .
0,165 ûf sîne sêl entwâhen .
0,166 die schuolær snelle jâhen .
0,167 ez solte im niet sîn swære .
0,168 ob junge schuolær .
0,169 von vrîheit des herzen
0,170 eteswenne smerzen .
0,171 an der sêl entviengen .
0,172 mit vröuweden si dô giengen .
0,173 nâch des meisters râte .
0,174 ze der zouberschuole drâte .
0,175 dô wart in snelle dâr getragen .
0,176 ein buoch daz was wole beslagen .
0,177 mit übergulden spangen .
0,178 si begunden drangen .
0,179 nâch dem buoche enwiderstrît .
0,180 der meister sprach “ez kumet noch zît .

0,181 daz iuch geriuwet diser tac .
0,182 swenne iuch des grimmen tôdes slac .
0,183 wirdet trîbente von dem buoche .
0,184 unde swenne die sêl ze gesuoche .
0,185 mit jâmerlichem smerzen .
0,186 von iuwerm harten herzen .
0,187 satanâsn beginnet vüeren .
0,188 sô wirdet iuch êrste rüeren .
0,189 gar ze spætiu riuwe .
0,190 des ich gote wole getrûwe .”
0,191 der rede wurden si unvrô .
0,192 si sprâchen meister diser drô .
0,193 gezæme wole alten wîben .
0,194 ir sulet si lân belîben .
0,195 durch hōvischheit iuwerre zühte .
0,196 wan iuwer künste vrühte .
0,197 wellen wir versuochen .
0,198 der meister hiez nâch buochen .
0,199 sînen schuolær balde gân .
0,200 daz beslagen buoch wart ûf getân .
0,201 vore in beiden an der stat .
0,202 si vunden an dem êrsten blate .
0,203 geschriben wole mit minne .
0,204 unz ûf die dritten linien .
0,205 “hier hebet sich an der sêle tôt .
0,206 der mit êwiclicher nôt .
0,207 vile grimme wirdet gebunden .
0,208 unde lasterlichen vunden .
0,209 in des tiuvels kiuwen .
0,210 von êwen unz hin ze êwen”
0,211 dô si die schrift erhôrten .
0,212 diu mit sô scharpfen Worten
0,213 ire herze hête beswæret .
0,214 der vrōuwede gar entbâr .
0,215 von des tôdes schricke .
0,216 mit wîtsweifem blicke .
0,217 sâhen si einander an .
0,218 der meister vrâgente began .
0,219 ob er in vürebaz solte lesen .
0,220 si sprâchen “hêrre jâ lânt uns wesen .
0,221 iemer iuwer knehte .
0,222 daz ir uns lêrent rehte .
0,223 di kunst unde ouch den hōhen list
0,224 der an dem buoche geschriben ist .”
0,225 der meister sprach “nû lesent dâr .
0,226 unde nement wizziclichen wâr .
0,227 waz diz unde daz bediute .
0,228 unde wie man wîse liute .

0,229 mit zouber müge verkêren .
0,230 dâr nâch wile ich iuch lêren
0,231 wîp unde manne betriegen .
0,232 gote unde der werelte liegen
0,233 dem tiuvel ruofen unde besweren
0,234 dâ mit sô müget ir wole gern .
0,235 den lîp nâch des herzen gire .”
0,236 si sprâchen “hêrre des biten wir .
0,237 durch hōvischheit iuwer tugende .
0,238 sehet niet an unser jugende .
0,239 ob diu sî ein teil ze kranc .
0,240 leset uns des müezet ir hōhen danc
0,241 von uns und von der werelte hân .
0,242 uns triege denne sin unde herzen wân
0,243 ez sol iuch niet geriuwen
0,244 des wir gote wole getrûwen .”
0,245 der meister las in an der stat .
0,246 mit vrōuweden kêrte er umbe daz blat .
0,247 sus lâsen si unde schrîben an .
0,248 des lîbes vluoch der sêle ban .
0,249 dô si die kunst entviengen .
0,250 wie snelle si dô viengen .
0,251 nâch des buoches urkünde .
0,252 die kunst der tiefen sünde .
0,253 die begunden si dô üeben .
0,254 got unde die werelt betrüeben .
0,255 mit maniger hande sünde .
0,256 ûf zouber niuwe vunde .
0,257 begunden si dô vinden .
0,258 sich selber vaste binden .
0,259 ûf unkiusche minne .
0,260 dâ mit si kiusche sinne .
0,261 manigem wîbe nâmen .
0,262 aller sünde sâmen .
0,263 begunden si dô sæjen .
0,264 snîden unde mæjen .
0,265 nützen unde niezen .
0,266 unde in den sünden vliezen .
0,267 sam der visch in den wâge .
0,268 si hêten selten vrâge .
0,269 wie ez der sêl ergienge .
0,270 unde wer si denne entvienge .
0,271 sô si mit kraft der grimme tât .
0,272 mit sô klagelîcher nôt .
0,273 von dem lîbe drünge .
0,274 unde herticlich bedwünge .
0,275 ze dem harten gotes gerihte .
0,276 daz hêten si vernihte .

0,277 swer in dâ von begunde sagen .
0,278 der muoste swîgen unde gedagen
0,279 an der selben stunte .
0,280 dem swarzen hellehunde .
0,281 begunden si dô ruofen .
0,282 wispeln unde wuofen .
0,283 mit maniger hande unvuore .
0,284 in überigem huore .
0,285 begunden si dô alten .
0,286 mit sünden manicvalten .
0,287 von tage ze tage ie baz ie baz
0,288a als ich ez an dem buoche las .
0,288b gîticheit ire herze besaz
0,289 vrâzheit unde trunkenheit .
0,290 was ire tagelîchez kleit .
0,291 hôchwart was ire spiegelglas .
0,292 si wurden müede nie noch laz
0,293 von unkiuschen sünden .
0,294 nû wile ich êrste gründen .
0,295 den vile swæren gotes zorn
0,296 den si hêten beide erkoren .
0,297 nâch der sêl unheile .
0,298 der wart ir ein ze teile .
0,299 mit deme herten vluoche .
0,300 wan ûf dem zouberbuoche .
0,301 begreif in der vile grimme tût .
0,302 der vaste mit klagelîcher nôt .
0,303 den lîp begunde toeten .
0,304 unde die sêle noeten
0,305 zuo dem helleviure
0,306 wilde unde ungehiure .
0,307 wurden sîn ougen blicke .
0,308 des grimmen tôdes schricke .
0,309 stiezen im daz herze enzwein .
0,310 sîn lîp sîn sêl lit unde bein .
0,311 begunden sich dô smiegen .
0,312 unde in einander biegen .
0,313 unde hertelîchen krachen .
0,314 von susgetânen sachen .
0,315 weste niet sîn trût geselle .
0,316 daz in daz viur der helle .
0,317 sô snelle wolte verslinden .
0,318 iedoch von zwein kinden .
0,319 wart ez im snelle kunt getân .
0,320 dô begunde er loufen unde gân .
0,321 dâ er den gesellen ligen vant .
0,322 sîn hende er klagelîchen want
0,323 er sprach “vile trût geselle .

0,324 mich wundert sêre waz welle .
 0,325 dîn siechtuom unde dîn starkez ligen .”
 0,326 der sieche sprach “mir ist verzigen .
 0,327 dirre werelte vröuwede .
 0,328 der gotelîchen beschöuwede .
 0,329 wirdet mir niemer ougenblic .
 0,330 satanâs der sol den sige .
 0,331 ûf mîner sêl gewinnen .
 0,332 des mac ich niet enttrinnen .”
 0,333 des antwurte er im drâte .
 0,334 mit der wîsheit râte .
 0,335 er sprach vile lieber buole .
 0,336 ûz diser zouberschuole .
 0,337 solt dû dich balde heizen tragen .
 0,338 wir sulen an gote sus niet verzagen
 0,339 dû weist wole daz geschriben ist .
 0,340 daz unser hêre – Krist .
 0,341 durch den süntær ist geboren .
 0,342 unde im selber hât erkoren .
 0,343 einen marterlîchen tôt .
 0,344 daz er êwiclîcher nôt .
 0,345 den süntær mohte entbinden .
 0,346 unde swer genâde vinden .
 0,347 wolte umbe sîne missetât .
 0,348 daz der mit der schrifte râte .
 0,349 mit rehter riuwe quæme .
 0,350 vüre got unde von im næme .
 0,351 antlâz aller sünde
 0,352 unde genædiclîchen vûnde .
 0,353 die sîezen gotes hulde .
 0,354 der siech sprach “mîner schulde .
 0,355 mac ich niet genâde vinden .
 0,356 wan mich wile verslinden
 0,357 der tiuvel in sîn wambe .
 0,358 der heizen helle vlamme .
 0,359 mac ich nû niet enttrinnen .
 0,360 ich muoze dâr inne brinnen .
 0,361 êwlich âne ende .”
 0,362 sus warf sich gein der wende .
 0,363 der siech in grôzen sorgen .
 0,364 sus begunde er worgen .
 0,365 in des tôdes schricke .
 0,366 mit schiuzlîchem blicke .
 0,367 sach er den gesellen wider an .
 0,368 er sprach “der swære gotes ban .
 0,369 hât mich nû gebunden .
 0,370 zuo den hellehunden .”
 0,371 des antwurte der gesunde .

0,372 mit wîsheit als er kunde .
0,373 er sprach vile trût geselle .
0,374 zuo der bittern helle .
0,375 bist dû weiz got niet geboren .
0,376 got bî im selber hât gesworen .
0,377 daz er des süntærs tôt niet wile .
0,378 kein mennische gesündet nie sô vile .
0,379 er vûnde wole gotes hulde .
0,380 ob er umbe sîne schulde .
0,381 entvienge rehte riuwe .
0,382 got ist wole sô getriuwe
0,383 daz er sîn bloede hantgetât .
0,384 in rechter riuwe niet en lât .
0,385 daz weist dû selber baz denne ich .
0,386 der sieche sprach “dû toubest mich .
0,387 mit überiger sprâche .
0,388 got muoz sîn geswinden rach .
0,389 an mir hiute erzeigen .
0,390 mîn leben muoz sich nîgen .
0,391 in daz apgründe .
0,392 wan mîner swæren sünde .
0,393 wile got niet vergezzen
0,394 mir ist ein stat gemezzen .
0,395 in dem helleviure .
0,396 wilde unde ungehiure .”
0,397 dô schrei der gesunde lûte .
0,398 gein sînem sundertrûte .
0,399 ûz leidem herzen grimme
0,400 mit klagelîcher stimme .
0,401 er sprach “vile lieber vriunt mîn .
0,402 verzage niet an dem schepfær dîn
0,403 er mac unde wile dir helfen baz .
0,404 unde wirdet dîn ouge in riuwe naz .
0,405 sô bist dû an der sêl genesen .
0,406 daz hâs dû dicke unde ofte gelesen .
0,407 von – heilicgeistes lêre .
0,408 geselle mîn nû kêre .
0,409 dich gein got daz ist mîn rât .
0,410 gedenke daz er gesprochen hât .
0,411 “qua – ingemuerit .”
0,412 daz sprichet in diutische an sweliche zît
0,413 der süntær sich lât riuwen .
0,414 sîn sünde mit ganzen triuwen .
0,415 unde von herzen grunde .
0,416 ûz riuwevarem munde .
0,417 einen siunften sende ze gote .
0,418 der siunfte wirdet ein hôher bote .
0,419 dem got niet mac verzîhen .

0,420 er müeze dem süntær lîhen .
0,421 swes er in dem siunften gert .
0,422 sus wart der schâchær ouch gewert
0,423 an den kriuze dâ er hienc .
0,424 bî gotes zesewen unde entvienc .
0,425 riuwe von herzen grunde .
0,426 dô wart im an der stunte .
0,427 daz paradîs entslozzen .
0,428 des hât manic sêl genozzen .”
0,429 der siech sprach “geselle mîn .
0,430 tuo mir hiute dîn triuwe schîn .
0,431 unde swîc von solichen sachen .
0,432 unde hoere mîn herze krachen
0,433 gein des tôdes vorhte .
0,434 wan ich hân verworhte .
0,435 gotes genâde unde hulde .
0,436 mîner swæren schulde .
0,437 mac mir werden niemer buoz .
0,438 gotes segen unde sîn gruoz .
0,439 hât sich vore mir verborgen .”
0,440 des antwurte im mit sorgen
0,441 sîn vriunt der gesunde .
0,442 er sprach ûz wîsem munde .
0,443 “vile herzenlieber vriunt mîn .
0,444 êre got unde troeste die sêle dîn .
0,445 mit einem siunften swære .
0,446 der wirdet sô trôstbære .
0,447 gote unde dîner sêle .
0,448 daz dich sancte Gabrîêle
0,449 vore aller himelschlîcher schar .
0,450 von allen sünden machet bar .
0,451 unde vrî vore missewende .
0,452 sich vriunt sô wirdet dîn ende .
0,453 guot süeze unde reine .
0,454 sô gewinnet dîn sêl gemeine
0,455 vröuwede mit der megede kinde .
0,456 vriunt sich ûf unde wis niet blint
0,457 dû maht noch weiz got wole genesen .
0,458 gedenke daz dû hâst gelesen
0,459 daz nie kein riuwe ze spâte wart .
0,460 wan nâch der lezzesten hinevart .
0,461 sô gewinne an siunften hulde .
0,462 gein got umbe alle schulde .
0,463 die der lîcham hât getân .
0,464 wir vinden ouch geschriben stân
0,465 daz sich got wile erbarmen .
0,466 über den süntær armen .
0,467 in dem lezzesten âtemzuge .

0,468 daz ist allez wâr unde niet ein lüge .”
0,469 dô schri der sieche sêre
0,470 gein sînes vriundes lêre .
0,471 von siechem herzen grimme .
0,472 mit zornlîcher stimme .
0,473 sprach er “vile lieber vriunt mîn .
0,474 der erbarmherzic schepfær dîn .
0,475 der helfe dir ich bin verzaget .
0,476 an im unde an der reinen maget .
0,477 diu in in ganzer kiusche gebar .
0,478 dort kumet ein tiuvellichiu schar .
0,479 mit der sô muoz ich varn hin .
0,480 sît ich an gote verzaget bin .
0,481 der muoz sich hiute rechen .
0,482 an mir unde ûf mich sprechen .
0,483 ein urteile alsô grimme .
0,484 diu mit des vluoches stimme
0,485 gemenet ist sô vaste .
0,486 daz von des vluoches laste .
0,487 mîn herze sich muoz zerren .
0,488 unde daz sich muoz ûf sperren .
0,489 diu helle gein der sêle mîn .”
0,490 des antwurte im der vriunt sîn .
0,491 mit einem siunften swære .
0,492 er sprach “vile bezzer mære .
0,493 wile ich dir lieber vriunt sagen .”
0,494 der siech sprach “dû solt gedagen .
0,495 unde solte versperren dînen munt .
0,496 wan an diser veigen stunt .
0,497 bin ich an – Krist verzaget .
0,498 daz sî dir offendlîche gesaget .”
0,499 dô sluoc sich ze herzen .
0,500 mit klagelîchem smerzen .
0,501 sîn vriunt der gesunde .
0,502 von leides herzen grunde .
0,503 schri er vile lûte unde sprach .
0,504 “sô wê mir hiute unde iemer ach .
0,505 daz ich dich ie ze vriunde gewan .
0,506 ich sihe wole daz dich niemandd kan .
0,507 gewîsen noch gelêren .
0,508 got muoz dîn herze kêren .
0,509 nâch sînen lobe des wûnsche ich dir .
0,510 vile lieber vriunt nû nîge mir .
0,511 dîn ôr unde gewer mich einer bete .
0,512 gedenke daz ich nie getet .
0,513 williclîchen wider dich .”
0,514 der sieche sprach “bit unde sprich .
0,515 ê daz ich verscheide .”

0,516 dô sprach mit herze leideme .
0,517 sîn vriunt der gesunde .
0,518 ûz vriuntlichem munde .
0,519 “ich bite dich vriunt ob dû maht .
0,520 daz dû mir an der drîzigen naht .
0,521 ûf jenem berge werdes schîn .
0,522 sich vriunt daz ist diu bete mîn”
0,523 sus zeigete er im vile balde .
0,524 gein einem vinsteren walde .
0,525 einen berc wilde unde hôch
0,526 der siech den âtemn swære zôch .
0,527 er sprach “daz tuon ich ob ich mac .”
0,528 dô kom des grimmen tôdes slac .
0,529 unde zarrete im daz herze enzwein .
0,530 starkiu lit unde hertiu bein .
0,531 begunden sich dô biegen .
0,532 unde in einander smiegen .
0,533 unde krachen harte vaste .
0,534 von des tôdes laste .
0,535 begunde er sich vaste zerren .
0,536 hende unde vüeze speren .
0,537 unde wider zesamen zücken .
0,538 unde in einander smücken .
0,539 unde balde wîte strecken .
0,540 krümben unde recken
0,541 unde in sich selber krimmen .
0,542 schûmen unde limmen .
0,543 begunde der sieche vaste .
0,544 von sînes herzen gaste .
0,545 wart er vile sêr geletzet .
0,546 der vröuweden bar gesetzt .
0,547 noch wile ich sagen vürebaz .
0,548 als ich ez an dem buoche lâse .
0,549 sîn zene begunde er wetzen .
0,550 vaste ûf einander setzen .
0,551 unde durch die zungen bîzen .
0,552 sîn varwe sach man glîzen .
0,553 in des tôdes gilwe .
0,554 ein wolkenn trüebe gehilwe .
0,555 huop sich vore dem siechen .
0,556 switzen unde riechen .
0,557 wart der verzagete hellebrant
0,558 des wart vile snelle ein hôhez pfant .
0,559 gezücket von dem herzen sîn .
0,560 ich meinen die sêl diu vuor dâ hin .
0,561 mit der tiuvellichen schar .
0,562 diu nâch der sêl was komen dar .
0,562a de socio paenitente

0,563 waz sol ich nû mêre sagen .
0,564 der lîcham wart ze velde getragen .
0,565 ungesprenget unde âne segen .
0,566 wan er verzaget was tôt gelegen .
0,567 an kristenlîchen gelouben .
0,568 des muoste man in berouben .
0,569 kristenlîcher gemein .
0,570 sus beleip sich alterseine .
0,571 sîn vriunt der gesunde .
0,572 ûz leides herzen grunde .
0,573 suochte er die wâren riuwe .
0,574 mit kristenlîcher triuwe .
0,575 kom er ze einem priester guot .
0,576 er sprach “hêrre mînes herzen muot .
0,577 hât mich her ze iu gewîst .
0,578 sît iuch got hât geprîst .
0,579 mit sô geistlîchen sîten .
0,580 dâr zuo sô hât iuch niet vermiten .
0,581 kunst zuht unde êre .
0,582 dâ von sô wile ich lêre .
0,583 hiute von iu entwâhen .
0,584 unde wile vile snelle gâhen .
0,585 von mînen starken sünden .
0,586 mîn unreht wile ich künden .
0,587 mit rehter riuwe wider mich .”
0,588 der priester sprach “sô wile ich dich
0,589 vile gerne hoeren an gotes stat .”
0,590 der süntær in dô sitzen bat .
0,591 unde kniewete vile wirdiclîche vûre in .
0,592 unde sprach “vile lieber hêrre mîn .
0,593 erschreckent niet von mîner sei .
0,594 unde merkent rehte mînes herzen klei .
0,595 des bite ich durch den hôhen got .
0,596 der grôze schande unde harten spot .
0,597 durch mich armen hât erliten .”
0,598 der priester sprach mit guoten sîten
0,599 “vûrhte dir niet vile liebez kint .
0,600 swie swære unde grôz dîn sünde sint
0,601 der muoz got hiute vergezzen .”
0,602 dô begunde er mezzen .
0,603 manigen siunften langen .
0,604 vile naz wart im sîn wange .
0,605 von manigem zaher grôzen .
0,606 die er begunde stôzen .
0,607 mit riuwe von sînen ougen .
0,608 dô sahte er âne lougen .
0,609 grôz unde kleine .
0,610 swaz er von kindes beine .

0,611 begangen hête mit sünden .
0,612 daz begunde er allez künden .
0,613 mit rehter riuwe des herzen .
0,614 nâch klagelîchem smerzen .
0,615 wart er mit ganzer bihte sich .
0,616 jungen harte wizzicliche .
0,617 rehte sam der adelare .
0,618 sô im sîn lîp ze swære .
0,619 von überigem alter ist .
0,620 sô wirdet er gar in kurzer vrist
0,621 wider junc als ich iu sage .
0,622 er vliuget hôhe an einen tac .
0,623 ob eines sêwes stamme .
0,624 ûf in der wolkenn vlamme .
0,625 dâ brennet er sîn gevider .
0,626 unde vellet denne her nider .
0,627 gar besenget in den sê .
0,628 sus wirdet er wider junc als êr .
0,629 unde wirdet im sîn gevider
0,630 wahsente schiere wider .
0,631 harte schoene unde glanz .
0,632 wole gevüezet unde ganz .
0,633 unde adellîche geschrenket .
0,634 sîn snabel wole gelenket
0,635 sîn ougen klâr unde sinewel .
0,636 sîn vlüge ringe unde harte snel .
0,637 sîn griffe wît unde dâr zuo lanc .
0,638 sîn herze küene unde vaste starc .
0,639 daz vinden wir von im geschriben .
0,640 sus hête den süntær ouch getriben
0,641 sînes herzen biht ûf hoehe enbore .
0,642 unz an daz himelschlîche tor .
0,643 dâ er in heizer riuwe .
0,644 nâch kristenlîcher triuwe .
0,645 sînes herzen übervlüzzeheit .
0,646 gar verbrennete unde besneit .
0,647 dâr nâch dô viel er in den sên .
0,648 ich meinen die zaher die ich êr
0,649 ûf sînem wange ligen sprach .